

Fundacion Go Cultura ta celebra 7 año di aniversario y ta presenta directiva nobo

Fundacion Go Cultura ta entusiasma y contento pa anuncia e celebracion di su di 7 aniversario.

A traves di e añanan cu a pasa, Go Cultura a bira un simbolo di preservacion y promocion cultural, empoderamento artistico y innovacion creativo na Aruba, mientras cu e ta sali na defensa di e Industrian Cultural y Creativo di nos isla. Conscientisando di e potencial increibel di e industrian aki pa transformacion social y diversificacion economico.

Parando keto na e logro importante aki, nos fundacion ta refleha cu un gratitud inmenso riba e sosten cu nos a ricibi for di comunidad Arubano, organisacionnan local y internacional, y individuonan cu nan contribucionnan ta esencial pa nos trayectoria.

Go Cultura a cuminsa como un proyecto visionario, cu e mision pa engrandece e sector cultural y creativo di nos isla, especificamente pa formalisa y desaroya e Industrian Cultural y Creativo di Aruba.

Loke a cuminsa como un sueño, den poco tempo a bira un organizacion vibrante dedica na pone cultura y creatividad den e curason di e desaroyo sostenibel di Aruba. E mision di e fundacion ta hopi cla: empodera artista y sernan creativo local, duna nan plataforma pa nan expresa y conscientisa di e potencial di e sectornan cultural y creativo pa nan contribui na transformacion social y diversificacion economico.

Logro y proyectonan:
Durante e 7 añanan aki, Go Cultura no a solamente inspira orguyo pa e herencia cultural di Aruba, sino tambe a entrega resultadonan tangibel. E fundacion a organisa tayernan pa artistanan y sernan creativo local, creando oportunidadnan pa crecemento personal y profesional. Ademas di esaki, Go Cultura tabata anfitrión pa cuater luna consecutivo di eventonan di networking tur fin di siman, uniendo henter un comunidad dinamico di artistanan y sernan creativo pa nan colabora, conecta y intercambia idea.

Logronan sobresaliente ta inclui:



- Conciertonan di recaudacion di fondo, uniendo nos comunidad pa celebra cultura mientras ta sostene y apoya proyectonan creativo.

- Programanan di television y documentarionan cu ta pone e diversidad cultural di Aruba y nos historia den spotlight.

- Foro Cultural, un plataforma durante e temporada di campaña di 2021, caminda politiconan a comparti nan visionnan pa e siguiente periodo gubernamental. Presente na esaki tabatin artistanan y sernan creativo, cu nan preocupacionnan y idea pa e futuro di e sectornan cultural y creativo di Aruba.

- Premio Nacional Crioyo di Oro, un evento anual cu ta honra y celebra e logronan mas sobresaliente den e sector artistico y cultural local, especificamente den e sector di "Arte di Tarima".

- Eventonan pa rindi homenahe na icononan local, pa sigura cu e herencia y legado cultural di Aruba keda bibo y wordo celebra pa e generacionnan binidero.

- Paranda Nacional di Dande: Go Cultura a introduci e proyecto innovativo aki pa preserva e tradicion di Dande di Aruba. E Paranda Nacional di Dande a pone musician y cantantenan riba trailer, permitiendone nan pasa den diferente barrio y distrito, treciendo e alegria di Dande y deseonan di bendicion, paz, felicidad y prosperidad na un publico mas amplio. E formato nobo aki a haci e experiencia cultural mas accesibel y a haya gran sosten di comunidad, yudando pa mantene e tradicion bibo mientras ta

adapt'e pa esnan di e generacion mas hoben. Haciendo nan curioso y entusiasma cu e tradicion musical aki.

E proyectonan aki ta subraya e compromiso firme di Go Cultura pa "walk the talk" y pa sostene y fortifica e sector cultural y creativo di Aruba. A traves di un acercamento colaborativo y enfoca riba comunidad, e fundacion ta comprometi na involucra artistanan, sernan creativo y entidadnan local pa contribui na desaroyo social y cultural di nos isla na un manera significativo.

Un directiva nobo pa futuro Banda di e celebracion di su di 7 aniversario, Go Cultura ta orguyoso pa anuncia su directiva nobo. Liderando e organizacion pa su siguiente capitulo ta:

- Arthur Loefstok, presidente y co-fundador
- Edjean Semeleer, vice-presidente, tesorero y co-fundador
- Amy Longott-Richards, miembro di directiva y consehero
- Thaïs Franken, miembro di directiva y consehero
- Shirenne Quandt, miembro di directiva

Siguiendo padilanti cu orguyo y gratitud

E exito di Go Cultura lo no ta posibel sin e sosten constante di e comunidad Arubano.

Nos fundacion ta extende nos sincero gradicimento na entidadnan local, companianan, organisacionnan y individuonan cu a colabora cu nos durante e añanan aki. Boso contribucionnan ta instrumental pa permiti Fundacion Go Cultura sostene e Industrian Cultural y Creativo di Aruba y haci e esfuerço pa demostra e potencial increibel cu e sectornan aki ta posee. P'esey mes nos lo celebra e aniversario aki



durante nos proximo evento grandioso cu ta e conferencia "CreActivo" cu lo tuma lugar diana 8 y 9 di october den Renaissance Convention Center.

Mientras nos ta celebra e logro importante aki, nos ta keda enfoca riba futuro cu

hopi entusiasmo, comprometi pa sigui conscientisa y apoya e sector cultural y creativo pa beneficio di tur habitante di Aruba. Hunto, nos por sigui cultiva un cultura vibrante y dinamico cu ta enriquece tanto e alma como e economia di nos isla. Masha danki un bes mas pa e apoyo!